

---

**CRITERIOS DE ELABORACIÓN DA PROGRAMACIÓN DOCENTE ANUAL (PDA) PARA  
O CURSO 2015/16  
(Aprobados no Consello de Goberno do 23 de xaneiro de 2015)**

O marco normativo da Universidade de Vigo aplicado para o cálculo das horas de profesorado empregadas na docencia presencial das ensinanzas de grao e de másteres con repercusión en POD asigna a cada titulación un número de horas de profesorado para distribuír en grupos docentes, de xeito que é o centro ou a comisión académica do máster (CAM) quen planifica os detalles de cada materia.

Co fin de planificar a organización académica do curso 2015/16, o Consello de Goberno de 23 de xaneiro de 2015 aproba os seguintes criterios de elaboración da programación docente anual das titulacións de grao e de máster.

**1) TITULACIÓNS DE GRAO**

**a) Horas asignadas**

As materias dun grao poden ser ordinarias (formación básica, obrigatorias e optativas) ou singulares (prácticas en empresa e traballo fin de grao).

**Materias ordinarias**

O número de horas de profesorado de cada grao calcularase, como en cursos anteriores, en función do indicador denominado *tamaño medio de grupo (TMG)* e da estimación de horas matriculadas no curso 2014/15 (**EHM**), de acordo coa expresión EHM/TMG.

A estimación de horas matriculadas resultará do número estimado de créditos ECTS matriculados multiplicado polo número máximo de horas presenciais (8,75) por crédito ECTS, establecido na normativa da Universidade de Vigo. Para estimar o número de estudantes en cada materia, computarase todo o alumnado de nova matrícula máis o alumnado de segundas ou sucesivas matrículas ata un do **15%** dos/as estudantes de nova matrícula desa materia. Para este cálculo, tomaranse como referencia os datos do curso 2014/15. O valor do TMG será o utilizado para a elaboración da programación docente anual (PDA) do curso 2014/15 aumentado nun terzo da diferenza entre dito TMG e o TMG obxectivo de 35. A estimación de horas por curso non poderá ser inferior a 8.75 veces o número de ECTS de materias ordinarias de cada curso.

O cálculo de número de horas de profesorado realizarase de xeito conxunto para os títulos dun mesmo centro que compartan materias.

As cuestións excepcionais dalgunha titulación serán estudadas pola COAP.

**Materias singulares**

O recoñecemento en POD dos labores de dirección dos Traballos Fin de Grao (TFG) e de coordinación de prácticas estará vinculado ao programa de recoñecemento de actividades

do PDI, polo que os créditos matriculados nesas materias non serán computables co criterio anterior.

## **b) Elaboración da PDA**

Os centros elaborarán unha proposta de PDA das titulacións de grao a partir das horas asignadas aos títulos de grao que teñen adscritos, indicando a distribución en grupos e os departamentos responsables.

Para a asignación de materias de formación básica os centros deberán elaborar unha lista priorizada de departamentos que poidan asumir o encargo. A COAP, á vista do conxunto de PDA dos centros, establecerá o departamento que asumirá a docencia tendo en conta as preferencias dos centros. Esta asignación múltiple priorizada poderá estenderse a calquera outra materia que o permita.

Co fin de garantir a optatividade, será necesario ofertar polo menos unha optativa máis das que ten que cursar o/a estudante.

Con anterioridade a elaboración da PDA, os centros recibirán unha bolsa de horas destinada ao recoñecemento de actividades que realiza o profesorado relacionadas con tarefas de coordinación de cursos, coordinación de intercambio de estudantes, coordinación de prácticas externas, actividades ligadas á xestión da calidade, organización dos traballos fin de grao, etc. Estes recoñecementos deberán contar coa aprobación da Xunta de Centro e serán analizados pola COAP, que poderá solicitar, se procede, unha revisión dos mesmos.

As propostas de encargo docente (PDA) deberán ser aprobadas pola Xunta de Centro e serán presentadas nos prazos establecidos pola Vicerreitoría de Organización Académica e Profesorado. Serán analizadas pola COAP que poderá solicitar, se procede, unha revisión das mesmas.

Excepcionalmente, a COAP poderá autorizar unha proposta de PDA dalgunha titulación no que o número global de horas se vexa incrementado, sempre que se poida constatar que se pode desenvolver exclusivamente co cadro existente de PDI a tempo completo. Neste caso, se por causas non contempladas no momento da aprobación do POD ou circunstancias sobrevidas, fose necesario realizar algún tipo de contratación, o centro deberá modificar total ou parcialmente a estrutura de grupos.

A solicitude de grupos ou materias en inglés deberá incluírse na proposta de PDA elaborada e aprobada polos centros para as titulacións de grao seguindo o procedemento de impartición de materias en inglés.

A programación docente anual das titulacións de grao será sometida á aprobación do Consello de Goberno.

## 2) TITULACIÓN DE MÁSTER

### a) Presencialidade das materias de máster

As horas de docencia presencial que recibe un estudante en cada materia ordinaria non poderá ser superior a 8 horas por ECTS. No caso de másteres presenciais, as horas de docencia que recibe un/unha estudante en cada materia ordinaria non poderá ser inferior a 5 horas por ECTS.

### b) Horas asignadas en máster con repercusión en POD

#### Materias ordinarias

As materias ordinarias dun máster con repercusión en POD xerarán una PDA igual á terceira parte dos ECTS matriculados na Universidade de Vigo en materias ordinarias no curso precedente (PDA máxima).

A oferta efectiva de materias optativas en cada curso académico será tal que as horas que computan en POD nas materias ordinarias ofertadas non poderá superar á PDA máxima, sempre que se poida garantir a optatividade, sendo necesario ofertar polo menos unha optativa máis das que ten que cursar o/a estudante.

As horas que computan en POD das materias ordinarias impartidas polo profesorado da Universidade de Vigo (excluíndo ao profesorado doutras universidades no caso dos másteres interuniversitarios) non poderán superar a PDA máxima do máster. A estes efectos, considérase profesorado da Universidade de Vigo tanto o profesorado propio como o profesorado externo (agás os pertencentes ás outras universidades que ofertan o título, no caso de másteres universitarios). A remuneración deste profesorado externo pola docencia impartida que compute dentro da PDA rexerese polas normas orzamentarias.

No caso de que o valor de PDA máxima sexa inferior ao número de horas necesario para poder impartir o título coa presencialidade mínima este será o número de horas para facer a PDA.

As cuestións excepcionais dalgunha titulación serán estudadas pola Comisión de Estudos de Posgrao.

#### Materias singulares

O recoñecemento en POD dos labores de dirección dos Traballos Fin de Máster (TFM) e de coordinación de prácticas estará vinculado ao programa de recoñecemento de actividades do PDI, polo que os créditos matriculados nesas materias non serán computables co criterio anterior.

### c) Horas asignadas en máster sen repercusión en POD

Nos másteres sen repercusión en POD, será a Comisión Académica do Máster (CAM), coas limitacións establecidas apartado 2.a) e as derivadas do seu orzamento, a que aprobe o número de grupos e materias optativas ofertadas.

#### **d) Elaboración da PDA e aprobación do POD**

As CAM elaborarán unha proposta de PDA da titulación de máster indicando a distribución en grupos e asignarán as horas que correspondan ao profesorado que participe na docencia do máster.

A solicitude de grupos ou materias en inglés deberá incluírse na proposta de PDA elaborada e aprobada polas CAM para as titulacións de máster seguindo o procedemento de impartición de materias en inglés.

As propostas serán presentadas nos prazos establecidos pola Vicerreitoría de Organización Académica e Profesorado.

A programación docente anual das titulacións de máster será sometida á aprobación do Consello de Goberno.